

Joaancha

letoi nichataja

Caiho coroaeca Joanne

¹Canu inara bichauhenaneeinne, caa quiricha laenaain letoareunni jataain esinae rauhijiriin quicha belai Caiho rai.

²Cana Coaunera coreniha quicha belai Caiho, icheina Cana Coaunera bajaau ichorataanihane, nii ena caohatiin jeriha rai Suujuene rijijieein neeine tocohaneein raotojoeein raurohin neeine coina. ³Jerichanejeein caohachaain rauhijiriin ii suujua corelanaala Cana Coaunera aitoonjoan tonoraain neeine beeuruha cana nejeraauru tabaauru turuhinne jaunna, nii coitucuhin jataain rachoojoeuin.

⁴“Esinaete chuhisi aitoha Cana Coaunera tonoraajeein neeure Cana Coaunera coreniha cacalabihuru,” naaina jataain rachoojoeuin.

⁵Casuujua aina cutaain quicha belai, jataain caohatiinte erena tonoraain nii cana letoaa Cana Coaunera jaan ichaain neei. Leechaauru cana nejeraauru coroatajanein, nii coriajai caje uhin turunacaauru cana nejeraaurune maajeein coroatajaneine jaunte, jataain jelai amuritoheriin caohacha ichaai. ⁶Nii jaunte, turuhin satiin aonajeuruha Cana Coaunera ranojoneein nenacaaurune jana, jataain

acaauru belaiin caohatiin ichaain neeine beebejeeure. Atiin chaelai latecuruha namuna jaan raine quene acaauruhacha latei teeu, jeriha Cana Coaunera rijijieein. ⁷Acaaurute Jesocurisito que erena beebejena que amihanena ichaa nii uure. Coatiha acaauru coroatajanena jerecuruha Cana Coaunera coitucuhichurune jana jerecuruhi. ⁸Nii jaunte, cana itolere que acaauru coroatajanichaachene caohachae, aina raotojoein abaantaain Cana Coaunera ere beebejeeuruhane coina.

Baasoneein ichaa Diotrefesine jana, caohacha ichaane coaratihia Demetirione

⁹Cana Coaunera rai ita taojiaain Cana Coaunera bajaaurera raina leinjiin quiricha laenaain letoaaunlu. Nete cocoinanohineein nihacaanune ere tonorana jerene Diotrefesi, acaacha cacha letoaane rautatohane jaun.

¹⁰Chaente jataain casajenetiin, nechu jataain joanreein canacaanu ere rocohin canacaanu irijiae. Nii jaunna rautaenihacaanu. Chaen jetaote, Cana Coaunera coroaecuruhane coina ita taojiaauruhane jana turuuruha cana nejeraaurune, enooruhane caohateein sitanajae. Chaen jetaote, niha cotijiaain ranajaerane caohate. Niina jataain

rautaenihanune jaun, inae turuha
uhanune bana cotijiaain rai aitoreeunni.

¹¹Aonaun canejera. Jiaonriha ii netonai,
nitohaneein baaso jelson ii suujua cuaain
neeine. Caohachaacha que ii suujua coaraain
neeun. Caohacha ichaera cachate, Cana
Coaunera aina nereein. Jana baaso ichaera
cacha, Cana Coaunera aina nerinaain.

¹²Satiin cachaaurute caohachaain suujua
coaara cachaniha Demetirione beeur, esinae
rauhijiriin caohachanejeein nihane jaun.
Canacaanu netonainecheu caohachanijihane
bihacaanu. Iite chabana nohanelanaala
irihacaanune coitucuhi.

**Niicha laenai quiricha
satono tiha Joanne**

¹³Jataainte ne banejelanaala ichei
irihanune jaanu. Nena quiricha
cuhane cuaain ichei aitona jereneeun.

¹⁴Nii jaunne ena ichoharaa unaa
jereeun, caraajenihane ichei
aitocooaunne coina.

¹⁵Chaque tonajelanaala raotojoein
neeun. Satiin cana belaichaurute ii
coaaucure. Atiin, “Inara coaacuruha-
jera,” naain nii cuu nenacaauru cana
belaichauru rai beeu.